

Mud Volapüka

Nüm 32

25 novul 2016

Rubrig gramatik

Yö

Lintelek „yö“ binon vokäd yuba:

yö! evikodob!

yö! prodam ela „Half-life 3“ eklülädon!

Za, zao, ze

Präpods „za“, „ze“ e ladvärb „zao“ sinifons „tüi ...“, „tio ...“, „täxeto ...“ e jonons patöfi (mödadilo mödotik) täxetik bosa:

za mens *mil* äkomons is = **ze** mens *mil* äkomons is = **tüi** mens *mil* äkomons is = **täxeto** mens *mil* äkomons is = mödot menas **no vemo diston de mil**

za *düps mäl* = **za** *düp mälid* = **vü** *düps lulid e velid* (tim verätik binon nesevädik)

zao *tü düp mälid* = *tü tim za düp mälid*

äreidob buki at **zao** ünü *düps kil* = äreidob buki at **tio** ünü *düps kil* (de 4:47 jü 7:53 = *düps kil* e minuts mäl ≈ *düps kil*)

iremob buki at **zao** bü *yels tel* = iremob buki at ün *eyel*

Zi

Ladvärb „zi“ sinifon „nilo de ...“ e jonon das bos papladon nilü yeg semik.

is **zi** = **no fagiko de** is = **nilo de** is

ai binön **zi** *nilü* ek = ai binön **no fagiko** *de* ek = ai binön **len** ek =
ai binön **lä** ek = ai binön **pö** ek

Zu, zuo

Konyun „zu“ e ladvärb „zuo“ sinifons „läfulükiko“, „löpü etos“, „plä etos“ e jonon nuni, notetis läyümiks (**zuiks**):

adelo iklinükob cemi okik e **zu** ifireidob buki = adelo **zuo** ifireidob buki (plä etos, das iklinükob cemi okik) = adelo iklinükob cemi okik e pos atos **voto** tim libik iposblibon ad fireidön buki

ädelo pö konsärt musigalef ämusigon legudiko; **zuo** us äkomon kor kel äkaniton lopüli = pö konsärt musigalef ämusigon **ä** kor äkaniton lopüli

Zü, züo

Präpod „zü“ e ladvärb „züo“ jonons das bos papladon nilü yeg semik de (pö) flans (zugs) alik u mufon ve mied lölik yega:

snek evoulon **zü** bim = snek eginükon oki su (love) stam bima

milit neflenik **ezü**on zifi = milit neflenik ekoupon ziläki **zü** zif =
milit neflenik ekoupon **zü**amöpis zifa = milit neflenik eblokon zifi **pö flans alik**

jonel düpik fitulon **zü** zänod gloka tä düp bal = fin jonela düpik
figolon **züo** ve sirkül gloka tä düp bal = jonel düpik duinon tuli lölik bal
a düp

Äl

Präpod „äl“ sinifon „lü ...“ e jonon das yeg anik binon *lüäl*ik u
mufon lü bos (ad nilikön lü bos):

lölogön **äl** sül = lölogön **löpio lü** sül

tenükön namis oka **äl** flans valik = tenükön namis oka **lü** flans
valik = tenükön namis de od

yan binon **äl** süt = yan **dugon (segolon) lü** süt

Ö!

Lintelek „ö!“ binon vokäd stuna, süpäda:

ö! atos ebinon süpik!

ö! no äno lob atosi, jenofoti nitedik at!

Ön

Präpod „ön“ jonon stipis, dinäd is bosa:

ön nem foginik el ‚Albert‘ = **gebölo** nemi foginik = **labölo (labü)**
nemi foginik = nemü ‚Albert‘

hers lagons **ön** brul slapik = hers logotons (sümätöns) bruli slapik
lagölo

ön kodül = stipä (bisä), das ... = **ifü** kodül = **bisü** kodül

ön stad brietik = stadölo brietik = labölo stadi brietik

Û, üd

Konyun „ü“ sinifon „u ...“, „i sevädikon as ...“, „u votiko panemöl as ...“, labon sinifi plänik, sevabo, pagebon bevü nems, bepenams leigädabiks e jonon das nem votik yega paloseidon:

„CHOOH“ binon fomül kiemavik stöfa *metatazüd ü furmidatazüd* = „CHOOH“ binon fomül kiemavik stöfa **kel sevädikon as metatazüd u (votiko) furmidatazüd** = „CHOOH“ binon fomül kiemavik stöfa *metatazüd u votiko panemöl as furmidatazüd*

Noet: fom „üd“ pagebon fo vöds primiköl me (dese) vokat ad distükön miedis vödas pö sagam.

oli nemoy eli ‚Alexandr‘ **üd** eli ‚Alex‘ brefo

Ûf, üfü

Konyun „üf“ e präpod „üfü“ sinifons „ön stip if ...“:

ukanol begön obi ad kömön **üfü zesüd yufa** = ukanol begön obi ad kömön **üf onedol yufi obik** = ukanol begön obi ad kömön **ifü zesüd yufa** = ukanol begön obi ad kömön **if onedol yufi obik**

nedos lüvön bumoti **üfü lefil** = nedos lüvön bumoti **pö lefil**

üfü deadam oba, begob blamön neki = begob blamön neki **ifü (tefü, demü) deadam oba**

üf viloyöv ye pübön nuni seimik nogna u pluna in yelod ot, okanoy dunön atosi = **ön stip if (stipä) viloyöv ye pübön nuni seimik nogna u pluna in yelod ot**, okanoy dunön atosi

Üfo

Ladvärb „üfo“ binon vödil geilükumöl, sinifon „täno (üfü jenet at)“, „üfü atos“ e pagebon ön säks, vokäds püköfaviks:

kikodo **üfo** eselol-li atosi? nedol *ga* atosi, no-li? = nedol *ga* atosi, no-li? **täno** kikodo eselol-li atosi?

if binos ol, büdolös **üfo** obi ad kömön su vat lü ol! = if binos ol, **täno üfü atos** büdolös obi ad kömön su vat lü ol!

kisi **üfo** dunom-li? = kisi **ibo** dunom-li?

Ün

Präpod „ün“ jonon timi jenota:

ün adel = adelo = **pö** adel = **timü** adel = **tü** adel

ün tim ot = ottimo

ün tim et = ettimo

ün del alik = aldeliko

Ünü

Präpod „ünü“ jonon vütimi jenota:

ünü *del* lölik = **de prim dela jüesa fin dela**

no oblümikom **ünü** vigs fol = no oblümikom **tüpü** vigs fol

ünü brefüp = **dü** brefüp

Säkis, küpetis e lofotis aliks ä materis e volanuns nitediks kanols lüsedön lü penedabog «komunan@yandex.ru».